


Fasnacht 2005



VERSCHNUUFFER

ReniTanz! = Tanz us dr Raihe

D Geegebewegig 05

Mir sin drgeege, haisst d Devise,
grad geege-n-alles: Geege Gryyse,
au geege Dummheit, Hass und Truur,
und Toleranz - mir blyybe stuur.

Mir wänn kai Zwängele und Trotze
und au kai Blöfferei und Protze,
kai Luug und Truug und au kai Bschiiss,
nit liebi Lyt, nai Volgg mit Biss!

Das lätze Zfridesyy, das fuule,
au d Dekadänz, und s Pseudo-coole,
das ka-n-ys alles gstoole blyybe -
ufs Banner wämmer „Anti“ schryybe.

Mir reniTanze us der Raihe
und tanze Anti-Ringelraihe,
well ys der Geegesinn so loggt
und s ewig Mitgoo schregglig bloggt.

De blinggsch no linggs und goosch no rächts,
das isch doch aifach ebbis Schlächts,
wenn Du kai Mainig mee darfsch ha:
e Gruess vo „Pro Helvetia“!

Uns loot das farbloos schlaff Getue,
das lätzi Frindligsyy kai Rue,
uns bloggt, was um ys umme goot
und langsam gseen mir schwarz statt rot!

Mir sin drum geege rot und grien,
wel die nur Schulde mache dien,
und geege schwarz und blau und bruun,
und - logisch - geege FC Thun!

Denn simmer geege s Siemens-Tram
und d Zollfreistroos - und das scho lang -
und schliesslig geege Basel-Land,
und geege Lyt mit zvyyl Verstand!

Worum, froggsch jetzt, sin die so gfruschtet?
Wel ys das Basel nimme gluschtet!
Mir hänn die Stadt so langsam satt
und finde s Doosyy nimme glatt.

Dr RTV duet nur verliere,
der Rodscher duet ys ignoriere,
sogar der Tschudi lauft dervo!
Nur d Sozialfäll blyybe do.

En Armetszyygnis isch die BaZ,
fir nyt me Gscheits het s dinne Platz.
Es isch e Schand, De muesch Dy freie,
dass d Zircher uns ihr Blatt yygheie!

Me macht die gscheite Kinder dumm,
dangg Schuelreform ad libidum.
Und sueche Kinder do Asyl:
jaggt me sy hai, ganz ooni Gfyyl.

Es filze Sozi vo de Grangge
zig Dausig dringend bruucht Frangge,
zem sich der Waalkampf finanziere -
pfui Deifel, Fetz, mi duets scheniere!

S isch Basel unter Vormundschaft,
well sogar d Aidsgenossenschaft
het miesse gseh, dass Ain vo Zää
vom Arbetsamt sy Loon muess nää.

D „La Ola“ duet me z Ziiri starte,
wenn d Schugger uff uns Basler warte.
So wird d Frau Maurer - s wird Dr wool,
zem greschte Zircher Aigegoal!

Der Dootetanz - s isch nid famos -
tanzt bi-n-ys neischters uff der Strooss.
S wird dealt und graubt, ganz unverdrosse
und wenn De Päch hesch wird gar gschosse.

Das wänn mir ys nimm gfalle loo,
und händ drum s Gschigg in d Finger gnoo:
So tanze mir jetz us der Raihe
und reniTanze unsre Maie.

Mir tanze fir e neii Stadt,
wo friidlig, suuber isch und glatt.
Sunscht leege mir das Reggli aa -
und warte-n-uff e Sänsesmaa...

www.verschnuuffer.ch